



**RÈGLEMAN ENTÈN
MANB FONDATÈ
ÒGANIZASYON BENE POU NOU TOUT
(OBNT)**



RÈGLEMAN ENTÈN MANB FONDATÈ YO

Atik 1- Definisyon Manb Fondatè.

Manb Fondatè Òganizasyon BENE POU NOU TOUT, se Fanm ak Gason ki rejwenn premye inisyatè lide a. Se moun ki pataje, makònen epi aksepte filozofi Pwomotè lide a ap fè pwomosyon pou li a.

Tout moun sa yo ki vini **Manb Fondatè Òganizasyon BENE POU NOU TOUT**, yo vini genyen menm dwa ak **Pwomotè lide a nan tout desizyon depi se pou bon mach Òganizasyon BENE POU NOU TOUT**.

Youn nan pi gwo desizyon sa yo, konsène depans pou avansman **Òganizasyon BENE POU NOU TOUT**.

Nan sans sa a, **Manb Fondatè yo se fanmi, zanmi, ak etranje ki rejwenn Pwomotè lide a pou fòme Premye pi gwo Estrikti Òganizasyon BENE POU NOU TOUT**.

Atik 2- Reprizantasyon Manb Fondatè yo.

Manb Fondatè a genyen yon estrikti ki ap dirije li ki pote non : **Komite Manb Fondatè (KMF)**. Se Komite sa a ki la pou dirije ak administre tout kesyon ki konsène **Manb sa yo ki genyen pou reyini, diskite ak debat tout dosye ki pote sou objektif OBNT** ap pousuiv lòske yo genyen Konvokasyon ki soti nan **Komite Manb Fondatè a (KMF)**.

Atik 3- Konpozisyon Komite Manb Fondatè (KMF).

Komite Manb Fondatè a (KMF) ap administre ak yon **Komite ki genyen senk (5) Manb** ladan li ki se :

- ✚ Prezidan
- ✚ Sekretè Jeneral
- ✚ Responsab Trezò
- ✚ Pòt Pawòl
- ✚ Konseye Jeneral.

Atik 3.1- Wòl rès Manb yo.

Tout lòt **Manb Fondatè yo** ki nan kategori Manb board la a ap jwe wòl manb. Yo ap genyen pou yo diskite ak pran desizyon nan reyinyon **Komite Manb Fondatè yo (KMF)** ap genyen pou planifye.

Atik 4- Atribisyon Komite Manb Fondatè (KMF).

Komite Manb Fondatè (KMF) genyen pou atribisyon :

- **Planifye ak pwograme** gwo desizyon estratejik **OBNT**.
- **Pwopoze** plan tavya ak potfèy bidjè anyèl **OBNT**.
- **Elabore** bidjè **Komite Manb Fondatè a (KMF)** pou sipote **OBNT**.
- **Veye** sou bon fonksyonman **OBNT** pa rapò ak Estatè epi Règleman entèn yo.
- **Evalye** travay **kategori manb team** kise **Group Teknik Entèkansyon (GTE) an** ap fè.
- **Resevwa** dosye kandida ak evalyasyon yo pou entegre **OBNT**.
- **Resevwa** tout rapò **kategori manb team** kise **Group Teknik Entèkansyon (GTE) an**.
- **Resevwa** Rapò, Kont Randi, Sigjesyon/Rekòmandasyon lòt manb yo.
- **Aplike** disiplin ak sanksyon sou manb ki fotif.

Atik 5- Wòl ak Responsablite chak Manb nan Komite Manb Fondatè a (KMF).

A- Prezidan.

- + **Reprezante ak reponn** ak tout konvokasyon, aktivite yo envite **Òganizasyon** an sou plan nasyonal ak entènasyonal.
- + **Konvoke Komite Manb Fondatè a (KMF)** ak **Kategori Manb Board la** nan reyinyon òdinè ak ekstrawòdinè.
- + **Prezide Reyinyon komite Manb Fondatè a** pou yo pran desizyon pou kategori yo.
- + **Prezide seyans Asanble Jeneral Òganizasyon** an.
- + **Prezide ak Konvoke Manb yo nan Asanble Jeneral Manb Òganizasyon** an.
- + **Delibere sou desizyon ki pou sòti nan Asanble yo:**
 - ❖ **Asanble Jeneral Òganizasyon** an (AJ- OBNT)
 - ❖ **Asanble Jeneral Manb Òganizasyon** an (AJM- OBNT).
- + **Otorize ak manb yo** entegrasyon nouvo Manb aprè etid ak verifikasyon dosye kandida a.
- + **Veye sou bòn mach Òganizasyon** an ak sou desizyon Asanble manb yo pran.
- + **Siyen tout dokiman administratif Òganizasyon** an.
- + **Bay apwobasyon sou tout** depans ki ap fèt sou non **Òganizasyon** an.
- + **Siyen ak Sekretè Jeneral la Pwosè-Vèbal Reyinyon Komite Manb Fondatè a (KMF).**
- + **Siyen ak Responsab Trezò a Rapò finansye Komite Manb Fondatè a (KMF).**
- + **Kontwòle tout aktivite Òganizasyon** an ap fè.
- + **Resevwa tout rapò kotegori manb yo** la ap genyen pou soumèt ak **KMF la.**

B) Sekretè Jeneral.

- **Konsève** ak ranje tout rejis manb ak tout lis byen, ekipman, materyèl, **Òganizasyon** an.
- **Ajoute** tout nouvo manb, manb ki kite ak sa ki mouri nan rejis Manb **Komite Manb Fondatè a (KMF).**
- **Resevwa** epi transmèt dosye nouvo Manb **Òganizasyon** an ak Prezidan pou swivi.
- **Ekri lèt envitasyon**, fè apèl ak tout Manb **Komite Manb Fondatè a (KMF)** ak Rès Manb ki nan Kategori sa a lè genyen reyinyon.
- **Pran nòt lè genyen reyinyon Komite Manb Fondatè a (KMF)** ak reyinyon **Kategori Manb Board.**
- **Ekri tout Pwosè-vèbal reyinyon Òdinè ak Ekstawòdinè Komite Manb Fondatè a (KMF).**
- **Fè lekti pwosè vèbal** ak Kont randi reyinyon **Komite Manb Fondatè a (KMF).**
- **Anrejistre tout** desizyon ki pran nan **Asanble Jeneral (AJ)** ak **Asanble Jeneral Manb Òganizasyon** an (AJM- OBNT) aprè li fini resevwa yo.
- **Jere tout** dokiman administratif **Òganizasyon** an nan tèt kole ak Administratè-tris.
- **Klase** tout dokiman ki sòti anndan ak deyò **Òganizasyon** an pou kapab estoke yo sou sit **Òganizasyon** an ak rejis fizik yo.
- **Siyen** ak Prezidan an Pwosè-vèbal ak Rapò Administratif **Komite Manb Fondatè a (KMF).**

C) Responsab Trezò.

- + **Resevwa** kotizasyon masyèl obligatwa ak Montan anyèl kès asistans sosyal **Òganizasyon BENE POU NOU TOUT (OBNT).**
- + **Jere tout** antre ak depans **Komite Manb Fondatè a (KMF)** ap fè.
- + **Jere fason lajan** ap rantre nan **KÈS** ak **KONT** labank **Òganizasyon** an nan tèt kole avek Kontwòlè-Kontwòlèz finansye **manb komite a.**
- + **Jere tout** depans asosyasyon an ki sòti nan bidjè **Asanble Jeneral Òganizasyon BENE POU NOU TOUT**
- + **Kolekte tout** chif sou byen **Òganizasyon** an posede nan tèt kole ak Responsab Lojistik la.
- + **Ekri bidjè fonksyonman Komite Manb Fondatè a (KMF).**



- ✚ **Resevwa** bidjè Fonksyonman **Òganizasyon** an.
- ✚ **Anrejistre tout antre ak sòti lajan** **Òganizasyon** an sou baz dokiman **manb Komite a** ap soumèt.
- ✚ **Mete disponib tout pyès ki jistifye** **acha, depans, dèt, prè, don** sou non **Òganizasyon** an.
- ✚ **Pezante eta finansye** lè genyen reyinyon **Komite Manb Fondatè (KMF)**.
- ✚ **Prezante Rapò finansye** nan **Asanble Jeneral** **Òganizasyon** an.
- ✚ **Siyen** ak Prezidan an Rapò finansye **Komite Manb Fondatè a (KMF)** ak **Òganizasyon** an.

D) Pòt Pawòl.

- **Pran lapawòl** nan non **Òganizasyon** an sou plan nasyonal ak entènasyonal lè prezidan an anpeche.
- **Kominike** pawòl ak mesaj enpòtan **Komite Manb Fondatè a (KMF)** ak tout rès **Manb** yo ak lòt estrikti **Òganizasyon** an.
- **Reprezante** **Òganizasyon** an nan envitasyon ofisyèl yo sou delegasyon **Komite Manb Fondatè a (KMF)**.
- **Fè kont randi** lè li deplase nan envitasyon ofisyèl yo ak **Komite Manb Fondatè a (KMF)** epi ak tout rès **manb** yo.
- **Fè rapwochman** **Òganizasyon** an ak tout lòt entistasyon tankou **prive, piblik, sosyete sivil ak entènasyonal**.
- **Fè pwomosyon** ak enfòmè lòt moun sou aktivite **Òganizasyon** an ap fè pou li kapab genyen nouvo **manb** ak bon renome.
- **Defann valè, onètete, ak repitasyon** **Òganizasyon** an devan tout lòt moun.

E) Konseye Jeneral.

- ✚ **Bay bon jan konsèy ak bòn direksyon** sou tout desizyon ki ap pran nan **Komite Manb Fondatè a (KMF)** ak **Òganizasyon** an.
- ✚ **Ranplase yon lòt manb** nan **Komite Manb Fondatè a (KMF)** lè genyen vakans ak anpèchman.
- ✚ **Akonpaye ak bay asistans** ak **Komite Manb Fondatè a (KMF)** ak tout lòt estrikti yo nan travay yo ap fè.
- ✚ **Veye sou fason tout estrikti** **Òganizasyon** an ap fonksyone epi fè rekòmandasyon pou yo rive byen fonksyone.
- ✚ **Sèvi Abit** lè genyen bouch louvri ak chire pit nan **Komite Manb Fondatè a (KMF)** ak lòt estrikti **Òganizasyon** an.

Atik 6- Pwosedi Eleksyon ak Dire Komite a

Komite Manb Fondatè a (KMF) ap monte pa mwayen vòt inanim tout **manb kategori Manb board** la pwale pou diferan pòs ki genyen nan **Komite a**. **Manb** yo kapab pote yo kandida volontè oubyen yo deziye yo nan yon pòs sou baz eksperyans ak konpetans yo genyen.

Nan ka yon deziyasyon pou yon pòs, depi tout **Manb Fondatè yo** dakò pap genyen vòt se sèlman aklamasyon ki ap genyen.

Nan ka genyen **Manb Fondatè** ki dakò ak lòt **Manb Fondatè** ki pa dakò, se pa mwayen yon vòt nan mitan **Manb Fondatè yo** kandida a ap rive genyen pòs la. **Se toujou vwa majorité a ki ap pase.**

Komite Manb Fondatè a (KMF) la pou yon dire yon lane (1 an). Manda li ap kòmanse nan dat eleksyon an, pou monte ou renouvle **Komite a** nan li te fèt la.

Atik 7- Dwa Prezidan an nan Konvokasyon ak Moderasyon reyinyon.

Kèlkeswa reyinyon ki ap fèt la sou kèlkeswa fòm li ap fèt la tankou fizikman, apèl konferans ak apèl videyo, se Prezidan an ki ap genyen dwa pou li fè konvokasyon ak tout Komite Manb Fondatè a (KMF) epi se limenm tou ki ap moderatè reyinyon an.

Sepandan, nan ka Prezidan an ta genyen yon anpechman, se **Sekretè Jeneral** la a ki ap genyen dwa pou li jwe wòl Prezidan an genyen nan konvokasyon ak animasyon reyinyon.

Konsa tou, kit se **Prezidan** an kit se **Sekretè Jeneral** la ki te fè konvokasyon an, **youn nan yo kapab mande nenpòt manb nan Komite a pou jwe wòl moderatè nan reyinyon an** pou pèmèt patisipasyon anplis chak manb nan jesyon tan rankont yo ak tan lapawòl.

Atik 8- Reyinyon Komite Manb Fondatè (KMF) ak Sanksyon.

Tout Manb **Komite Manb Fondatè a (KMF)** yo ak res manb yo dwe prezan nan tout reyinyon ki ap fèt, **kèlkeswa fòm li ap fèt la, tankou; Fizikman, apèl konferans ak apèl videyo.** Si toutfwa ta genyen yon manb ki pap ka prezan nan yon reyinyon an, **Manb Fondatè a dwe fè Prezidan an konnen sa davans.** Sof nan ka ijans men fòk manb la ka pwouve ijans li a.

Nan ka kontrè, **Manb Fondatè ki prezan yo ap pran sanksyon kont Manb Fondatè ki absan an.**

Lè sa a, **Manb Fondatè a ap genyen pou li peye kòm penalite (\$ 20 US pou manb ki ap viv nan peyi letranje, de mil (2000) goud pou manb ki ap viv Ayiti) nan yon dat ki pa dwe depase (twa) 3 jou.** Si delè (twa) 3 jou a ta pase san **Manb Fondatè a** pa peye penalite a, **Manb Fondatè sa a ap pèdi tout kalite dwa Manb li.** Pou li rejwenn tout kalite dwa manb li, **li ap genyen pou vèse tout montan penalite yo yon sèl kou.**

Atik 9- Respè Règleman Entèn nan Desizyon Manb Fondatè yo.

Kèlkeswa desizyon majorite **Komite Manb Fondatè a (KMF)** ap pran ak rès Manb yo, **fòk desizyon sa a pa vyole youn nan atik ki nan Règleman Entèn **Òganizasyon BENE POU NOU TOUT (OBNT)**.** Si desizyon an ta rive vyole **Prensip Fondamantal Règleman Entèn nan komite manb fondatè a, desizyon sa a, menm si se majorite Manb Fondatè yo ki pran li ebyen desizyon an pap valab.**

Atik 10- Delè pou Konvokasyon Manb Fondatè yo.

Tout konvokasyon pou reyinyon **Komite Manb Fondatè a (KMF)** ap fèt venkatrè tan (24è) alavans. **Sepandan, si ta genyen yon ijans nan **Òganizasyon BENE POU NOU TOUT (OBNT)**, nan ka sa a, Prezidan an ap genyen dwa pou li konvoke tout Manb Fondatè yo san li pa teni kont ni jou ak lè li ye a.**

Atik 11- Desizyon ki pou sòti nan ka yon Manb Fondatè abandone.

Si nan yon reyinyon **Komite Manb Fondatè a (KMF)** ta genyen pou yo pran yon desizyon pou bon mach **Òganizasyon BENE POU NOU TOUT (OBNT)**, ta genyen yon **Manb Fondatè ou plizyè Manb Fondatè ki ta deside kite reyinyon an pou kèlkeswa rezon an, san reyinyon an poko fini, lè sa a, lòt Manb Fondatè yo ki rete a ap genyen dwa pou yo pran kèlkeswa desizyon an** depi se pou bon mach **Òganizasyon** an depi li kadre ak **Estatif Òganizasyon** an.

Atik 12- Kowòm pou Komite Manb Fondatè a (KMF) pran Desizyon.

Tout gwo desizyon **Komite Manb Fondatè a (KMF)** ap genyen pou yo pran pou bon mach **Òganizasyon BENE POU NOU TOUT (OBNT)**, **Manb Fondatè yo dwe pran li nan yon reyinyon epi reyinyon sa a dwe genyen pou pi piti twa (3) Manb Fondatè** ladann. Nan ka pa ta genyen **twa (3) Manb Fondatè pou pi piti**, desizyon sa a pap valab pou **Òganizasyon** an.



Atik 13- Obligasyon Prezans pou Manb Fondatè yo.

Nan tout reyinyon ki ap fèt pou pran desizyon pou bon mach **Òganizasyon BENE POU NOU TOUT (OBNT)**, tout Manb Fondatè yo obligatwaman dwe prezans. Si toutfw a ta genyen yon Manb Fondatè ki pap kapab prezans nan reyinyon an, lè sa a Manb Fondatè a dwe bay rezon valab ki ap fè li pap kapab prezans.

Après twa (3) konvokasyon youn kole ak lòt, Manb Fondatè a dwe prezans nan reyinyon an. Si sa pa rive fèt, pap genyen rezon valab ankò. Lè sa a, lòt Manb Fondatè yo ki prezans an ap pran tout desizyon yo dwe pran pou bon mach **Òganizasyon BENE POU NOU TOUT (OBNT)**.

Atik 14- Dwa pou Sanksyon Desizyon Manb ki pa Kadre.

Genyen kèk desizyon sitou si ta genyen kèk ijans nan **Òganizasyon BENE POU NOU TOUT (OBNT)**, Komite Manb Fondatè a (KMF) ou plizyè Manb Fondatè kapab deside pou bon mach **Òganizasyon** an si toutfw a tout lòt Manb Fondatè yo pa ta disponib nan moman sa a.

Men nan yon reyinyon, yon Manb Fondatè ou plizyè Manb Fondatè kapab kase desizyon an, si aprè analiz, desizyon an pa ta kadre ak Estati **Òganizasyon** an.

Atik 15- Obligasyon Fidelite nan Desizyon ak Deklarasyon Piblik yo.

Tout desizyon, tout deklarasyon Manb Fondatè yo pataje ak tout lòt manb **Òganizasyon BENE POU NOU TOUT (OBNT)**, piblikman dwe respekte epi pibliye kontni an san chanje yon yota ladan li.

Atik 16- Obligasyon Respè Youn Pou Lòt ak Sanksyon.

Respè youn pou lòt se yon obligasyon nan mitan tout Manb Fondatè **Òganizasyon BENE POU NOU TOUT (OBNT)**, menm jan sa ekri nan atik yo ki nan Estati **Òganizasyon** an. Si yon manb ta rive manke dega ak yon lòt manb, Manb Fondatè ki vyole prensip la ap genyen pou li peye (\$ 100 US pou manb ki ap viv nan peyi letranje, twa mil (5000) goud pou manb ki ap viv Ayiti) kòm yon penalite nan yon delè ki pa dwe depase twa (3) jou fran.

Anplis, Manb Fondatè a ap genyen pou prezante eskiz li ak tout lòt Manb Fondatè yo sou fòm vèbal ou ekri nan Plafòm vityèl Manb Fondatè yo. Nan ka Manb Fondatè a ki vyole prensip ak respè youn pou lòt la ta refize prezante eskiz piblik li, Manb Fondatè a ap pèdi tout kalite dwa manb li.

Atik 17- Kondisyon Pou Manb Fondatè a Rejwenn dwa Manb li.

Pou Manb Fondatè a rejwenn tout kalite dwa manb li ankò, fòk li peye tout jou ki pase yo aprè (twa) 3 jou fran li te genyen an. Chak grenn jou sa yo se (\$ 10 US pou manb ki ap viv nan peyi letranje, mil (1000) goud pou manb ki ap viv Ayiti). Aprè Manb Fondatè a fini peye penalite a, li ap genyen pou fè yon eskiz vèbal oubyen ekri dabò ak Komite Manb Fondatè a (KMF) epi ak tout rès Manb Fondatè yo.

Atik 18- Manb Referans ak pèt privilèj.

Sou peryòd yon lane, tout Manb Fondatè yo dwe referans youn oubyen plizyè manb nan **Òganizasyon** an. Sa kapab rive yon Manb Fondatè pa ta referans lòt manb. Lè sa rive, Manb Fondatè a ap pèdi avantaj pou jwi privilèj bay tèt li kòm kandida pou komite manb fondatè a toutotan li pa rive referans youn ou plizyè manb nan **Òganizasyon** an.

Atik 19- Frekans Reyinyon ak Sanksyon.

Komite Manb Fondatè a (KMF) li menm ap reyini de (2) fwa nan mwa chak 2èm ak 4èm dimanch pou diskite afè kourant **Òganizasyon** an. Manb Komite a ap jwenn yon mesaj rapèl chak fwa nan men Sekretè Jeneral la sou jou ak lè reyinyon sa ap fèt. Dire reyinyon sa a se 1è a 2èd tan. Li pa dwe depase 2èd tan.



Tout Manb Fondatè yo dwe reyini pou pi piti yon (1) fwa nan mwa a pandan 2èd tan pou pi piti, pou Manb Fondatè yo diskite sou pwogrè ki fèt ak pèspektiv yo. Konvokasyon sa ap fèt ak tout Manb Fondatè yo sou platfòm vityèl yo pa yon mesaj oubyen yon nòt ki pote siyati Sekretè Jeneral Komite Manb Fondatè a (KMF).

Tout Manb Fondatè yo ap genyen pou yo peye yon montan (\$ 10 US pou manb ki ap viv nan peyi letranje, Mil (1000) goud pou manb ki ap viv Ayiti) chak fwa li pap kapab prezan kòm penalite si pa genyen yon motif valab pou sa. Montan sa dwe vèse nan yon dat ki pa depase sèt (7) jou fran. Nan ka Manb Fondatè a refize peye penalite a, li ap pèdi tout kalite dwa manb li. Pou li rejwenn tout kalite dwa manb li, li ap genyen pou vèse tout montan penalite yo yon sèl kou.

Atik 20- Pèt Kalite Dwa Manb Fondatè.

Kèlkeswa Manb Fondatè a ki ta genyen pou li peye yon penalite, epi ki pa rive peye penalite a nan dat ki te fikse pou sa a, lè sa a Manb Fondatè a ap pèdi otomatikman tout kalite dwa manb li.

Atik 21- Rekouvremant Dwa Manb ak Limitasyon dwa a.

Si yon Manb Fondatè ta pèdi tout kalite dwa manb li, epi aprè sa Manb Fondatè a ta rejwenn tout kalite dwa manb li, lè sa a, tout desizyon lòt Manb Fondatè yo te gentan pran pou bon mach **Òganizasyon BENE POU NOU TOUT (OBNT), nan moman absans Manb Fondatè a te pèdi tout kalite dwa manb li a, li pap kapab bay opinyon li ni kase okenn nan desizyon ki te gentan pran yo.**

Atik 22- pwosedi pou yon manb demisyone

Si yon Manb swa nan Komite Manb Fondatè a (KMF) oubyen nan Kategori Manb Board la, pou yon rezon kelkonk ta deside demisyone, pou pwòp rezon pa li epi san yo pa ni fòse li ni mande li demisyone, li genyen yon fason pou li fèsa.

- **Tou dabò, Manb Fondatè a dwe konsilte Manb fondatè ki te pèmèt entegrasyon li nan **Òganizasyon BENE POU NOU TOUT (OBNT)**, pou diskite avèk li sou sa.**
- **Après sa, Manb Fondatè a ap genyen pou li konsilte Prezidan Komite Manb Fondatè **Òganizasyon BENE POU NOU TOUT (OBNT)**, ki te bay otorizasyon pou li rankontre lòt moun yo pou diskite sou motif ak kontrent li genyen ki fè li oblije demisyone.**
- **Se aprè li fini konsilte ak diskite ak de (2) Manb sa yo, Manb la ap genyen posiblite pou ekri lèt demisyon li a ki ap adrese ak **Komite Manb Fondatè a (KMF)**.**
- **Pwosedi sa valab pou tout manb Manb Fondatè yo ki ap demisyone.**
- **Pou Manb Fondatè ki te nan **Komite Manb Fondatè a (KMF)**, fòk li remèt tout dosye ak materyèl **Òganizasyon BENE POU NOU TOUT (OBNT)**, ki te nan men li yo epi bay yon ti tan pou pèmèt lòt manb ki ap ranplase li a genyen konesans sou dosye li te trete yo epi genyen achiv sa yo pou travay la kapab kontinye. Anplis fòk li peye tout dèt li te genyen anvan **Òganizasyon an** avan demisyon li an asepte.**
- **Pou yon Manb Fondatè ki pa te nan **Komite Manb Fondatè a**, li dwe peye tout dèt li yo avan demisyon li an asepte.**

Atik 23- Byen materyèl ak imateryèl epi fason pou yo itilize.

Tout byen materyèl ak imateryèl dwe disponib pou tout Manb Fondatè **Òganizasyon BENE POU NOU TOUT (OBNT), Tout byen materyèl ak imateryèl **Òganizasyon an** pa dwe itilize pou afè pèsonek kèlkeswa Manb Fondatè li ye a.**



Atik 24- Konfidansyalite nan Pataj Enfòmasyon.

Si ta genyen yon Manb Fondatè pou yon rezon ou pou yon lòt ki ta deside pataje enfòmasyon pèsone **Òganizasyon BENE POU NOU TOUT (OBNT)** pou yon rezon ou pou yon lòt, ak yon lòt manb ou plizyè lòt manb ki pa genyen otorizasyon pou sa, epi ki pa fè pati nonplis Manb Fondatè **Òganizasyon** an, selon jijman ak gravite ka a, komite Manb Fondatè a ap genyen tout dwa pou yo retire tout kalite dwa manb fondatè a. Manb Fondatè sa a pap janm genyen aksè ak enfòmasyon pèsone **Òganizasyon** an ankò epi li pap janm ka poze kandidati li pou yon pòs electoral menm si Manb Fondatè a ta rejwenn tout kalite dwa manb li te pèdi a. Epi pou Manb Fondatè a rejwenn tout kalite dwa manb li ankò, fòk li peye \$200 us kòm penalite sou plas san delè.

Atik 25- Repatisyon Depans yo.

Tout depans ki prevwa fèt pou bon mach **Òganizasyon BENE POU NOU TOUT (OBNT)** dwe fèt kolektif epi ekkitab, sa vle di nan tèt ansanm, egal ego ak tout Manb Fondatè yo.

Atik 26- Kotizasyon Manb Fondatè yo.

Tout kotizasyon Manb Fondatè yo pou reyalize yon pwojè kèlkonk swa a kou tèm, mwayen tèm ak lon tèm dwe opworata. Okenn Manb Fondatè pa genyen dwa pou li prete ni reprann li aprè kotizasyon Manb Fondatè a.

Atik 27- Montan kotizasyon pou Manb Fondatè yo.

Kontribisyon Manb Fondatè yo, se pou manb ki ap viv nan peyi letranje ak peyi Dayiti.

- ❖ Manb peyi letranje : \$30 us pou pi piti.
- ❖ Manb lokal : 1000 Goud pou pi piti.

Atik 27.1- Pervòd kotizasyon manb yo.

Kontribisyon tout manb Fondatè yo obligatwa. Montan sa dwe vèsè chak mwa, sòti premye (1) pou rive ken (15) nan mwa a. Depi ken (15) la pase nan mwa a manb la pa ta gentan vèsè montan kotizasyon dwa manb li, lè sa a manb la ap genyen pou li vèsè 10% reta sou montan mwa a.

Atik 27.2- Lòt pervòd kotizasyon ki otorize.

Kèlkeswa manb fondatè li ye a kapab vèsè montan kotizasyon dwa manb li chak twa (3) mwa, sis (6) mwa, nèf (9) mwa epi douz (12) mwa a lavans pandan lanne a.

Atik 27.3- Limit pou manb ki pa kotize ak pèt dwa manb li.

Kèlkeswa manb fondatè li ye a, li pa genyen dwa pou li depase katrevendis (90) jou, sa vle di twa (3) mwa san li pa vèsè montan kotizasyon dwa manb li. Si sa ta rive pou yon manb Fondatè ta pase katrevendis (90) jou san li pa ta vèsè montan kotizasyon dwa manb li ak tout 10% reta yo, manb fondatè a ap pèdi tout dwa manb li. Apati moman sa, manb la pap kapab jwi kèlkeswa privilèj la tankou (patisipe nan renyon, vote pou yon desizyon, bay lide pali pou yon pwopozisyon kelkonk elatriye) nan **Òganizasyon BENE POU NOU TOUT (OBNT)**.

Kèlkeswa manb fondatè li ye a, pa gen dwa depase yon lanne ki vle 12 mwa san li pa reprann dwa manb li te pèdi a, si sa ta rive manb sa ap retire nan sistèm **Òganizasyon BENE POU NOU TOUT (OBNT)**, pou manb la retounen nan sistèm nan ankò li dwe pase tout pwosesis entegrasyon yo ankò e li dwe peye tout dèt li yo pandan ane pase a ak entegrasyon li ankò.

Atik 28 - Pwosedì pou reprann dwa manb li.

Pou manb Fondatè a rive jwenn dwa manb li te pèdi a, fòk li vèsè **TOUT montan kotizasyon li te dwe vèsè yo pandan katrevendis (90) jou** a epi fòk li tou vèsè **tout montan kotizasyon** dwa manb li pandan **absans dwa manb li yo ak tout 10% reta yo**. Lè manb la ap fè sa, **li dwe vèsè tout montan kotizasyon dwa manb li yon sèl kou**. Konsa Komite Manb Komite Manb Fondatè a (**KMF**) ap pèmèt manb la reprann dwa manb li te pèdi a.

Atik 29- Dispozisyon final sou kotizasyon manb yo.

Chak ken (15) nan mwa desanm nan lanne a, se dènye mwa pou tout manb **Òganizasyon BENE POU NOU TOUT (OBNT)** pou yo vèsè tout montan kotizasyon dwa manb yo. Menm si se yon mwa sèlman li ye, fòk manb la vèsè montan sa pou fasilite reyalizasyon bilan lanne a. Sinon manb la ap genyen pou li peye yon **penalite 30% sou chak mwa** manb la pa te gentan vèsè montan kotizasyon dwa manb li pandan lanne a.

Atik 30- Itilite kotizasyon an.

Youn nan rezon ki fè Administrasyon **Òganizasyon BENE POU NOU TOUT (OBNT)** mande patisipasyon chak manb fondatè li yo yon kotizasyon, se pou bon fonksyoneman ak avansman **Òganizasyon** an.

Atik 31- Kontribisyon yon manb pou tounen resous Òganizasyon BENE POU NOU TOUT (OBNT)

Kontribisyon manb fondatè yo **pa pou okenn manb fondatè a tit pèsònèl, sa vle di se pou tout manb li ye**. Lè nou mete yo ansanm, yo tout tounen **FON Òganizasyon** an ki ap aji anba chapo yon **Pèsòn moral**.

Atik 32- Materyèl ak Ekipman Òganizasyon BENE POU NOU TOUT (OBNT).

Tout materyèl ak ekipman **Òganizasyon BENE POU NOU TOUT (OBNT)** se byen prive li. Pa genyen manb fondatè ki otorize pou sèvi ak materyèl sa yo kòm si se te byen pèsònèl yo.

Atik 32.1- Dwa pou itilize materyèl ak ekipman Òganizasyon BENE POU NOU TOUT (OBNT).

Sèlman manb administrasyon Òganizasyon an ki genyen dwa pou itilize tout materyèl ak ekipman yo sof nanka ijans yon lòt manb ap kapab itilize materyèl **Òganizasyon** an Men fòk manb la jwenn otorizasyon pou sa pa Komite Manb Fondatè a (**KMF**).

Atik 33- Entèdiksyon sou materyèl Òganizasyon BENE POU NOU TOUT (OBNT).

Nenpòt Manb ki genyen yon materyèl/ekipman oubyen plizyè materyèl/ekipman **Òganizasyon BENE POU NOU TOUT (OBNT)** nan men li, manb la pa genyen dwa: **Vann li, fè kado li, prete li, twoke li, pran li, ni mete li nan plàn/brikabrak elatriye.**

Atik 34- Sanksyon sou movèz itilizasyon materyèl ak ekipman Òganizasyon BENE POU NOU TOUT (OBNT).

Si toutfwa yon manb nan **Òganizasyon BENE POU NOU TOUT (OBNT)** ta vyole sa **atik 33 a di a**, men ki sanksyon ki ap tann li:

Manb la pap kapab itilize materyèl/ekipman **Òganizasyon** an pandan trant (30) jou. Manb la dwe remèt materyèl la nan yon dat ki pa dwe depase trant (30) jou. Si tan yo bay manb la pou remèt materyèl la pa respekte **Òganizasyon** an ap oblije trennen manb la Lajistis. Aprè lajistis fini tranche kòz la, **Òganizasyon** an ap aplike sanksyon pa li sou manb la.

Atik 34.1- Sanksyon aprè peryòd trant (30) jou.

Menm si manb la ta remèt materyèl la oubyen ekipman an avan trant (30) jou a, malgre sa, manb la pap kapab itilize materyèl **Òganizasyon BENE POU NOU TOUT (OBNT)** pandan **katrevendis (90) jou**.



Atik 35- Sanksyon pou repetisyon vyolasyon atik 33.

Si menm manb la ta vyole **Atik 33 a** yon lòt fwa ankò, manb la ap genyen kenx (15) jou kounye a pou li remèt materyèl ak ekipman an. Sinon **Òganizasyon BENE POU NOU TOUT (OBNT)** ap oblije trennen manb la Lajistis.

Atik 35.1- Sanksyon aprè peryòd kenx (15) jou.

Menm si manb la ta remèt materyèl/ekipman an avan kenx (15) jou a, malgre sa, manb la pap janm kapab itilize materyèl/ekipman **Òganizasyon BENE POU NOU TOUT (OBNT)** ankò. Kidonk, **Komite Manb Fondatè a (KMF)** ap oblije ranplase manb la definitivman jan sa dwe fèt nan ka se yon manb KMF.

Atik 36- Retou materyèl ak sanksyon pou refi.

Kèlkeswa Manb Komite fondatè (KMF) ki pafè pati Komite a ak tout lòt manb fondatè yo pou yon rezon ou pou yon lòt ki ta kite komite a oubyen **Òganizasyon BENE POU NOU TOUT (OBNT)** dwe remèt tout materyèl ki nan men li. Si li refize fè sa, **Òganizasyon** an ap oblije trennen manb sa a devan Lajistis pou li kapab resevwa materyèl sa a, ou materyèl yo nan men li.

Atik 37- Radyasyon san reklamasyon.

Kèlkeswa manb fondatè ki ta deside pou yon rezon ou pou yon lòt kite **Òganizasyon BENE POU NOU TOUT (OBNT)**, manb sa a pap kapab fè okenn reklamasyon sou sa li te bay **Òganizasyon** an sou kelkeswa fòm nan.

Atik 38- Entegrasyon ak Modalite

Kèlkeswa manb Fondatè ki ap entegre nan sistèm **Òganizasyon** an, manb sa a ap genyen pou li ranpli yon fòm entegrasyon pou li bay kèk ti enfòmasyon de li epi bay yon montan ki se san dola ameriken (100) Us kòm frè entegrasyon li nan **Òganizasyon BENE POU NOU TOUT (OBNT)**.

Atik 39- Delè pou Siyati Règleman Entèn la ak Sanksyon.

Manb fondatè a genyen yon dèlè sèt jou (7) pou li kapab li, byen li e konprann tout sa ki di nan **Règleman Entèn Manb Fondatè a** avan li siyen dokiman an. Aprè siyati **Règleman Entèn** nan, pa **tout Manb Fondatè yo, si yon Manb Fondatè pa ta respekte akò li fini siyen an**, Manb Fondatè sa a ap genyen **yon delè twa (3) jou fran pou li deside**. Si delè sa a pase, **Manb Fondatè sa a pap kapab fè pati Manb Fondatè Òganizasyon BENE POU NOU TOUT (OBNT)** ankò.

Atik 40- Modifikasyon nan Règleman Entèn Manb Fondatè a.

Règleman Entèn Manb Fondatè a, kapab sibi yon modifikasyon sa vle di retire oubyen mete yon atik selon koz la e aprè jijman lòt manb fondatè yo nan yon **asanble jeneral (AJ)** avan eleksyon pou yon nouvo **komite manb fondatè (KMF)**.

Mwen li, mwen komprann, mwen aksepte tout règleman ki nan Règleman Entèn Manb Fondatè Òganizasyon **BENE POU NOU TOUT (OBNT)**: _____

Manb Fondatè

Pòtoprens Ayiti : Le 03 Fev 2023

